



IV GOVERNUN KONSTITUSIONÁL SEKRETARIA ESTADU KONSELLU MINISTRU

KOMUNIKADU IMPRENSA

Sorumutu Konsellu Ministru loron 9 fulan Maiu tinan 2012

Konsellu Ministru hala'o sorumutu iha kuarta-feira, loron 9 fulan Maiu tinan 2012, iha Sala Sorumutu Konsellu Ministru nian, iha Palásiu Governu, iha Díli no aprova:

1. Apresentasaun projetu atu selebra Akordu ida kona-ba Dezenvolvimentu Rejonál Integradu entre Timor-Leste no Indonézia

Ministériu Ekonomia no Dezenvolvimentu apresenta ba Konsellu Ministru projetu ida kona-ba Akordu Dezenvolvimentu Rejonál Integradu, ne'ebé Timor-Leste ho Indonézia tenke selebra iha tempu oin, atu reforsa fahe ba malu infraestruturasi, rai-maran no lalehan nian entre nasaun rua ne'e atu bele promove no reforsa kooperasaun ekonomia rejonál.

Konsellu Ministru aprova asinatura ba surat intensaun nian ida entre Ministériu Ekonomia no Dezenvolvimentu Timor-Leste nian no Ministru Koordinadór ba Asuntu Ekonomia Indonézia nian ne'ebé prevee kriaun grupu servisu ida atu selebra memorandu entendimentu ida hodi halo ezekusaun ba projetu Dezenvolvimentu Rejonál Integradu entre nasaun rua.

2. Rezolusaun Governu nian ne'ebé aprova nomeasaun Dr. José Ramos-Horta nu'udar enviadu espesial ba Konferénsia Rio +20

Konsellu Ministru hakotu hodi nomeia Prezidente Repúblika, Dr. Ramos-Horta, nu'udar Enviadu Espesial ba Konferénsia Nasoins Unidas kona-ba Dezenvolvimentu Sustentável, *Konferénsia Rio +20*, ne'ebé sei realiza iha sidade Rio de Janeiro, Brazil, husi loron 13 to'o loron 22 fulan Juñu tinan 2012.

3. Rezolusaun Governu nian ne'ebé aprova modelu Kartaun livre-tránsito ba titular no eis-titulár sira

Konsellu Ministru aprova modelu kartaun livre-tránsito ba titular no eis-titulár sira, membru no eis-membru órgaun soberania nian sira, tuir Estatutu Órgaun Soberania nian sira, ne'ebé estabeselese katak titular no eis-titulár sira órgaun soberania nian, nune'e mós eis-titulár no eis-membru ne'ebe ezerse ona sira nia funsaun ba períodu mínimu fulan haatnulu resin rua, iha direitu ba livre-tránsito.

4. Dekretu-Lei ne'ebé kria Servisu Rejistu no Verifikasaun Empreziál (SERVE) no estabeselese "Sistema Rejistu Komersiál Foun"

Ho kriaun Servisu Rejistu no Verifikasaun Empreziál (SERVE) no "Sistema Rejistu Komersiál Foun", atividade ne'ebé mak iha relasaun ho registu no linsensiametu komersiál sei konsentra iha fatin ida de'it, atu nune'e bele fasilita no halo lalais liután registu no inísiu atividade komersiál sira husi parte empreza no empreziári hodi naran inividuál. Prosesu ne'e simples liután tanba hasai ona prosedimentu balun.

Harii tiha ona Komisaun Interministeriál ida ba SERVE ne'ebé sei administra no jere área registu no linsensiametu komersiál no impostu.

Kriasaun servisu ida ne'e nian la'o tuir Planu Estratéjiku Dezenvolvimentu Governu nian no hatudu esforsu husi Ministériu hirak ne'ebé mak envolve-an atu halo Timor-Leste sai nu'udar País ida ne'ebé atrativu no kompetitivu iha área ekonomia nian.

5. Dekretu Governu nian ne'ebé estabeselese Kuadru Pesoál Karreira nian husi Ministériu Públiku

Diploma ida ne'e estabeselese kuadru pesoál karreira nian husi Ministériu Públiku, ne'ebé sei difine fatin mamuk ba kada kategoria karreira nian ida, tuir ida ne'ebé hatuur tiha ona iha artigu da-56 Lei n° 14/2005, 16 fulan Setembru, ne'ebé aprova Estatutu Ministériu Públiku nian.

Konsellu Ministru analiza , mós :

1. Apresentasaun kona-ba Planu Diretór Enerjia Renovável

Sekretaria Estadu Polítika Enerjética apresenta ona ba Konsellu Ministru Planu Diretór ida kona-ba Enerjia Renovável ba Dezenvolvimentu Eletrisidade iha Timor-Leste. Dokumentu ida ne'e bazeia ba realizasaun estudu ne'ebé halo ba fonte enerjia renovável oin-oin iha Timor-Leste, ne'ebé konklui katak País ne'e iha potenciál atu fó enerjia ho kuantidade boot atu prodús eletrisidade. Iha previzaun katak, to'o 2020, metade husi nesesidade enerjética Timor-Leste nian sei fornese husi enerjia renovável sira, no

viável liu mak enerjia husi bee, tuir fali mak, biomasa, enerjia husi loro-matan no ikus liu mak enerjia husi anin.

2. Aprezentasaun Estudu kona-ba Rekursu Umanu

Estudu ne'e, Universidade Nasionál Timor Lorosa'e (UNTL) mak apresenta ba Konsellu Ministru, iha rezultadu preliminar ne'ebé sei permite atu difine estratéjia nasional ida kona-ba dezvoltimentu rekursu umanu. Einjerál, dokumentu ne'e informa no analiza nesetidade nasional iha nível rekursu umanu atu proporsiona ba Governu hodi foti desizaun ne'ebé adekuada, inklui benefísiu finanseiru no ekonómiku, ba dezvoltimentu programa edukasaun no formasaun eskuzivu nian ida ne'ebé integra rekursu umanu, estratéjiku, ba prazu naruk.

Iha estudu ne'e halo inkéritu rihun 53 resin ba funionáriu (23.951) no ba estudante (29.243), ne'ebé foka liu ba estudu kona-ba perfil rekursu umanu iha Timor-Leste, liuliu iha identifikasaun kona-ba área estudu nian no kona-ba kualifikasaun funionáriu no estudante sira.